

經義考

冊九

經義考卷二百六十八

秀水 朱彝尊 編

男 昆田 校

擬經一

揚氏雄太玄經章句

隋志九卷

存章句佚

漢書雄大潭思渾天參摹而四分之極於八十一旁則三摹九據極之七百二十九贊亦自然之道也故觀易者見其卦而名之觀玄者數其畫而定之玄首四重者非卦也數也其用自天元推一畫一夜陰陽數度律曆之紀九九大運與天終始故玄三方九州二十七部八十一家二百四十三表七百二十九贊分爲三卷曰一二三與泰初曆相應亦有顓頊之曆焉揅之以三策關之以休咎緝之以象類播之以人事文之以五行擬之以道德仁義禮智無主無名要合五經苟非其事文不虛生爲其泰曼漈而不可知故有首衝錯測攤瑩數文捫圖告十一篇皆以解剝玄體離散其文章句尙不存焉

漢紀雄好賦頌晚節以爲無益而輒止乃依易著太玄經其文五十萬筮之以三十筮關之以休咎播之以人事義合五經而辭解剝玄體十一篇復爲章句

桓譚曰揚雄作玄書以爲玄者天也道也言聖賢制法作事皆引天道以爲本統而因附續萬類王政人事法度故宓犧氏謂之易老子謂之道孔子謂之元而揚子謂之玄太玄經三篇以紀天地人之道立三體有上中下如禹貢之陳三品三三而九因以九九八十一故爲八十一卦以四爲數數從一至四重累變易竟八十一而徧不可損益以三十五著揲之玄經五千餘言而傳十二篇又曰揚子雲才知聞道卓絕於衆所造法言太玄漢興以來未有此也 又曰揚雄不貧則不能作玄言

張衡曰觀太玄經知子雲殆盡陰陽之數也非特傳記之屬實與五經相擬

王充曰揚子雲作太玄造法言張伯松不肯一觀與之並肩故賤其言使子雲在伯松前伯松以爲金匱矣 又曰子雲作太玄侯鋪子隨而宣之

陸績曰雄建立玄經與聖人同趣雖周公繇大易孔子修春秋不

能是過

葛洪曰揚雄著太玄經夢吐白鳳凰集其頂上而滅 又曰揚雄酒不離口而太玄乃就

王隱曰玄經雖妙非益也是以古人謂其屋下架屋

袁準曰太玄幽虛而少效

阮孝緒曰太玄經九卷揚雄自作章句

顏之推曰揚雄投閣周章怖懼不達天命而桓譚以勝老子葛洪以方仲尼直以曉算術解陰陽故著太玄經夫太玄今竟何用乎不啻覆醬瓿而已

韓顯宗曰揚雄著太玄經當時不免覆盎之談二百年外則越諸子

王涯曰八十一首擬乎卦九贊之位類夫爻易以八八爲數其卦六十有四玄以九九爲數其首八十有一易之占以變玄之筮以逢數有陰陽而時有晝夜首有經緯而占有旦夕參而得之謂逢四位成列性在其中矣九虛旁通情在其中矣以一生三以三生九以九生二十七以二十七生八十一三相生玄之數也一首九贊故有七百二十九贊其外踳贏二贊以備一儀之月數玄之首

也始於中中之始也在乎一一之所配自天元甲子朔旦冬至惟一晝一夜終而復始天元二十七首中至事地元二十七首更至昆人元二十七首減至養

宋維幹曰揚子欲贊明易道乃大覃思渾天而作太玄蓋玄生於一而極於三天地人各有九重三而變故有二十七部天取其一地取其二人取其三自下相重三位成列各以其數成方州部家之道也因而革之推而盪之故謂之三表升降於六十四卦共成於八十一家由是廣其三材統成九位行陰陽進退之氣窮日星經緯之機有九州以統二十七部有二十七部以統八十一家自家至州統之於伯是以三材備而萬物生乃以三材配屬於一家乃以三家配屬於一部乃以三部配屬於一州乃以三州配屬於一方乃以三方配屬於一歲莫不推之以宿度佐之以五行首以準卦贊以類爻表以會象玄以明易運則通通則久久則極極則變變也者周而復始之謂也觀夫易象設位自下而生玄道位分自北而運運則能覆生則能載覆載交泰兩儀成動變在中吉凶休咎見乎外也故知觀玄者知易道之至深觀易者知玄道之至大玄則易也易則玄也玄則上行乎天地之氣易則下通乎天地

之神其用自中孚推六十四卦陰陽之度數律曆之紀綱九九大運之終始也詳夫聖人觀象於天觀法於地知天之氣五曰一移七曰一節地之氣五曰一應七曰一易進退有度出處有時所以拱默而經緯乎天下莫不其防也在乎微其杜也在乎漸二分二至履霜堅冰戒懼之至也所謂太玄之作其知幾乎若夫天道左行日月右迎天象昭列經緯時成陰陽相交晬魄相感陰陽氣盛感而下達地氣右動山澤相通陰陽相交晬魄相感陰陽氣盛而上通天地氣交水火相薄雷風相盪剛柔相摩寒暑生焉變化行焉四時成焉萬物立焉精氣爲物遊魂爲變變也者各有所歸天地以之乎相承彰往察來窮微盡變如谷從響無有幽遐非覃思之至精孰能與於此乎

吳祕曰太玄其事則述其書則作按自子辰申子冠之以甲分二十七章爲一會八十一章爲一統從子至辰自辰至申自申至子凡四千六百一十七歲爲一元與太初曆相應亦有顓頊曆焉此其事則述也作二百四十三表七百二十九贊十一篇此其書則作也

邵子曰揚雄作玄可謂見天地之心者也

司馬光曰予少之時聞玄之名而不獲見獨觀揚子雲之自序稱玄盛矣及班固爲傳則曰劉歆嘗觀玄謂雄曰空自苦今學者有祿利然尙不能明易又如玄何吾恐後人用覆醬瓿也雄笑而不應諸儒或譏以爲雄非聖人而作經猶春秋吳楚之君僭號稱王蓋誅絕之罪也固存此言則固之意雖愈於歆亦未謂玄之善如揚子所云也予亦私怪揚子不贊易而別爲玄易之道其於天人之蘊備矣揚子豈有以加之乃更爲一書且不知其焉所用之故亦不謂揚子宜爲玄也及長學易苦其幽奧難知以謂玄者賢人之書校於易其義必淺其文必易夫登喬山者必踐於峽岬適滄海者必沿於江漢故願先從事於玄以漸而進於易庶幾乎其可跂而望也於是求之積年乃得觀之初則溟滓漫漶略不可入乃研精易慮屏人事而讀之數十過參以首尾稍得窺其梗槩然後喟然置書歎曰嗚呼揚子真大儒者耶孔子旣歿知聖人之道者非揚子而誰孟與荀殆不足擬況其餘乎觀玄之書昭則極於人幽則盡於神大則包宇宙細則入毛髮合天地人之道以爲一刮其根本示人所出胎育萬物而兼爲之母若地履之而不可窮也若海挹之而不可竭也蓋天下之道雖有善者其蔑以易此矣考

之渾元之初而玄已生察之於當今而玄非不行窮之於天地之末而玄不可亡叩之以萬物之情而不漏測之以鬼神之狀而不違槩之以六經之言而不悖藉使聖人復生視玄必釋然而笑以爲得己之心矣乃知玄者所以贊易也非別爲書以與易競也何歆固知之之淺而過之之深也或曰易之法與玄異揚子不遵易而自爲之制安在其贊易乎且如與易同道則既有易矣何以玄爲曰夫畋者所以爲禽也網而得之與弋而得之何以異哉書者所以爲道也易網也玄弋也何害其既設網而使弋者爲之助乎子之求道亦謬矣且揚子作法言所以準論語作玄所以準易子不廢法言而欲廢玄不亦惑乎夫法言與論語之道庸有異乎玄之於易亦然大廈將傾一木扶之不若衆木扶之之爲固也大道將晦一書辨之不如衆書辨之之爲明也學者能專精於易誠足矣然易天也玄者所以爲之階也子將升天而廢其階乎先儒爲玄解者多矣然揚子爲文旣多訓詁指趣幽邃而玄又其難知者也故予疑先儒之解未能盡契揚子之志世必有能通之者比老終且學焉 又曰易與太玄大抵道同而法異易畫有二曰陽曰陰玄畫有三曰一曰二曰三易有六位玄有四重易以八卦相重

爲六十四卦玄以一二三錯於方州部家爲八十一首易每卦有六爻合爲三百八十四爻玄每首有九贊合爲七百二十九贊皆當期之日易有元亨利貞玄有罔直蒙酋冥易大衍之數五十其用四十有九玄天地之筮各十有八合爲三十六筮地則虛三用三十三筮易揲之以四玄揲之以三易有七九八六謂之四象玄有一二三謂之三幕易有彖玄有首易有爻玄有贊易有象玄有測易有文言玄有文易有繫辭玄有攤瑩捥圖告易有說卦玄有數易有序卦玄有衝易有雜卦玄有錯殊途而同歸百慮而一致皆本於太極兩儀三才四時五行歸於道德仁義也

林之奇曰揚子雲之太玄蓋擬於易之數也其泰積之要始於十有八筮終於天地人之數五十有四共爲七十有二而其半爲泰中之數故三十有六筮而虛三以筮焉此其爲多寡乘除之法又若有異於易者

楊時曰揚雄作太玄準易此最爲詎後學後之人徒見其言艱深其數汗漫遂謂雄真有得於易故不敢輕議其實雄未嘗知易也朱或曰揚子雲作太玄以擬易先儒已有屋下架屋之誚予嘗讀之拘拘於句法之蹈襲字訓之模倣信乎其不可也易以八爲數

推之而爲六十四玄以九數轉之而爲八十一易有元亨利貞玄有罔直蒙會易有象玄有首易有爻玄有贊易有象玄有測易有說卦序卦雜卦玄有數有衡有錯易曰雲從龍風從虎玄則曰風識虎雲知龍易闢戶之謂乾闔戶之謂坤玄則曰闔天之謂宇闢宇之謂宙其他率多此類亦何取於玄哉及讀桓譚新論又知一三九之類亦老子之緒餘耳而張衡謂其與易相擬陸績宋衷范望王涯之徒尤酷嗜之溫公至謂叩之以物之情而不漏測之以鬼神之狀而不違槩之以六經之言而不悖是皆溺於所好未得爲公論也

朱震曰曆元始於冬至卦氣起於中孚其書本於夏后氏之連山子雲通達陰陽之數故太玄之作發明連山之旨以準周易爲八十一卦凡九分共二卦一五隔一四細分之則四分半當一日準六十卦一卦六日七分也中中孚也周復也礮閑屯也少謙也辰睽也上千升也符羨臨也此冬至以至大寒之氣也差小過也童蒙也增益也銳漸也達交泰也庾侯需也從進隨也釋解也格夷大壯也樂豫也爭訟也務事蠱也更革也斷穀夬也此立春以至穀雨之氣也裝旅也衆師也密親比也歛小畜也彊睽乾也盛大

有也居家人也法井也應離也迎咸也遇姤也竈鼎也大廓豐也
文煥也禮履也逃唐遜也常恆也此立夏以至大暑之氣也永恆
也度節也昆同人也減損也唵守否也翕巽也聚萃也積大畜也
飾賁也疑震也視觀也沈兌也內歸妹也去无妄也晦瞢明夷也
窮困也剝剝也此立秋以至霜降之氣也止堅艮也成既濟也闕
噬嗑也失劇大過也馴坤也將未濟也難蹇也勤養坎也此立冬
以至大雪之氣也日月之行有離合陰陽之數有盈虛踦贏二贊
有其辭而無其卦而附之於養者以閏爲虛也踦火也日也贏水
也月也日月起於天元之初歸其餘也蓋定四時成歲者以其閏
月再劫而後掛者由於歸奇六日七分必加算焉以三百六十五
日四分之不齊也坎離震兌四正之卦也二十四爻周流四時玄
則準之日右斗左秉巡六甲東西南北經緯交錯以成八十一首
也一月五卦也侯也大夫也卿也公也辟也辟居於五謂之君卦
四者雜卦也玄則準之故一玄象辟三方象三公九州象九卿二
十七部象大夫八十一首象元士其大要則曆數也律在其中也
體有所循而文不虛生也

張行成曰玄紀日於牛宿者法日也紀氣於中首者法天也以罔

冥爲玄則艮之終始萬物神妙之理故太玄於三易實依連山而作也

晁公武曰太玄經十卷漢揚雄子雲撰雄作此書當時以誚其艱深其後字讀多異予嘗以諸家本參校不同者疏於其上且發策以問諸生云揚雄準易作太玄經其自序稱玄盛矣而諸儒或以爲猶吳楚僭王當誅絕之罪或以爲度越老子之書大抵譽之者過其實毀之者失其真皆未可信然譬夫聽訟曾未究其意烏能決其曲直哉今欲論玄之得失必先窺其奧然後可得而議也夫玄雖準易然託始高辛大初二曆而爲之故玄有方州部家凡四重而爲一首九贊通七百二十九贊有奇分主晝夜以應三百六旬有六日之度首準一卦始於中準中孚而終於養準頤二十四氣七十二候與夫二十八宿錯居其閒先後之序蓋不可得而少差也夫易卦之直日起於漢儒之學舍四正卦取六十卦之爻三百六十各直一日此玄之所準者也然易之卦直日其亦如玄之首有序乎抑無也若亦有之則雄之爲玄不亦善乎不然則玄之序亦贅矣自復姤而爲乾坤十有二卦皆以陰陽之消長分居十二月謂之辟卦固有序矣其餘一月而四卦之序云何耳如中孚

頤何以爲一日之卦也曰公卿大夫侯者何謂也其所謂屯正於丑閒時而左行蒙正於寅閒時而右行者其旨可得而聞歟又一陽一陰者玄相錯之法也然養爲陽而中不爲陰水火木金土者玄相傳之法也然狩爲金而羨不爲土其自相戾類如此豈得無說也哉

吳仁傑曰太玄以方州部家爲首倣易六畫而成卦也以初一至上九爲贊倣易六位而成章也首之數綦少而四綦多而十二而定爲九位焉老蘇先生所謂二者並行而其用各異者也

唐仲友曰雄最知大衍數者故玄數曰三八爲木四九爲金二七爲火一六爲水五五爲土玄圖曰一與六共宗二與七共朋三與八成友四與九同道五與五相守不言五十爲土五與十相守者知藏十之爲大衍也

鄭東卿曰揚雄之太玄子明之洞極倣易爲書泥於文字後世忽之以爲屋下架屋頭上安頭也

王炎曰揚子以言語求道故爲法言曰吾以擬論語也爲太玄曰吾以準易也無西子之美而效其顰亦增其醜而已

陳淳曰太玄本爲擬易而作也而又參之易緯以序卦氣準之太

初曆以考星度蓋雜乎爲書而不純於易密於數而道則未也夫
易以八爲數而玄以九爲數易數始於一一重之而爲二二重之
而爲四四重之而爲八八重之至於六十四而八八之數立焉故
自太極生兩儀兩儀生四象四象生八卦八卦生六十四卦玄數
始於一一轉之而爲三三轉之而爲九九轉之而爲二十七二十
七轉之而爲八十一而九九之數具焉故自一元分而爲天地人
之三方方各有三州三其三方而爲九州州各有三部三其九州
而爲二十七部部各有三家三其二十七部而爲八十一家易以
六畫成卦而玄擬以方州部家之四位四位立而首成焉自中至
事爲天元二十七自更至昆爲地元二十七自減至養爲人元二
十七合三二十七爲八十一首以擬易之六十四卦首下有辭以
擬卦之彖首爲有九贊以擬卦之六爻九其八十一首則爲七百
二十九贊贊下有測以擬爻之象爲七百二十九測測贊之外又
有玄衝以擬序卦玄錯以擬雜卦玄數以擬說卦玄攤玄瑩玄挽
玄圖玄告以擬上下繫至於筮策又以擬易之大衍虛其一而用
四十有九玄則虛其三而用三十有三大衍以乾之策二百一十
有六坤之策百四十有四合三百六十以當期之日積爲萬有一

千五百二十以當萬物之數而玄則以天數十有八地數十有八合三十六筴以律七百二十有九贊以當一歲之日積爲二萬六千二百四十四筴以配萬物之數大衍揲以四而玄則揲以三大衍以七八九六定六爻而辨吉凶玄則以七八九六定四位而別休咎與夫三摹之擬三索三表之擬四象一一與易相準而猶以爲未也何氏易緯稽覽圖創爲卦氣之說以爲起於中孚而終於頤六十卦別以坎離震兌爲四卦各主一方卦中二十四爻各主二十四氣其餘六十卦有三百六十爻主三百六十日餘有五日每日分爲八十分合四百分又四分日之一爲二十分是有四百二十分以六十卦分之六七四十二卦各得七分每卦得六日七分以當期三百六十五日四分日之一之數而玄則又從而參之始於中首以配中孚而終於養首以配頤凡八十一首皆法卦氣之次序首以二贊當一日凡七百二十九贊當三百六十四日有半又增躋贏二贊爲閏餘之數以足之太初上元十一月甲子朔日冬至無餘分後千五百三十九歲甲辰朔日冬至又無餘分又千五百三十九歲甲申朔日冬至又無餘分又千五百三十九歲復甲子朔日冬至無餘分而玄則又從而準之始於中首冬至之

節初一日起牽牛一度而終於養首之上九以周二十八宿之行而爲一歲十九歲爲一章二十七章凡五百一十三歲爲一會八十一章則三會凡千五百三十九歲爲一統自子至辰自辰至申自申復子凡三統九會二百四十三章有四千六百一十七歲爲一元一章則閏分盡一會則月分盡一統則朔分盡一元則六甲盡與太初曆相應是玄之爲數密矣然密於其數而道則未也吾觀其書有如中首曰陽氣潛萌於黃宮信無不在其中而養首又曰藏心於淵美厥靈根則天理始終循環無閒之義似亦察矣然於玄攤有曰其上也垂天下也淪淵纖也入蕞廣也包畛其道游冥而挹盈又曰虛形萬物所道之謂道因循無革天下之理得之謂德理生昆羣兼愛之謂仁列敵度宜之謂義又未能根極乎理義之大本而不免乎老墨之指歸於易之宏綱大義亦何所發明哉況乎以周配復以戾配睽以上配升以差配小過以童配蒙以增配益以達配泰以從配隨以進配晉以釋配解以樂配豫以爭配訟以更配革以斷配夬以裝配旅以衆配師以親配比以盛配大有以居配家人以竈配鼎以大配豐以逃配遯以永配恆以度配節以減配損以聚配萃以飾配賁以視配觀以晦配明夷以窮

配困以割配剝以止配艮以成配既濟以失配大過以難配蹇以養配頤徒區區爲字訓之模倣而復拘拘於句法之循襲易曰幽贊神明而生蓍而玄則曰昆侖天地而產蓍易曰雲從龍風從虎聖人作而萬物覩而玄則曰風識虎雲知龍賢人作而萬類同易曰闔戶謂之乾闔戶謂之坤而玄則曰闔天謂之宇闔宇謂之宙易曰乾確然示人易坤隤然示人簡而玄則曰天宙然示人神地他然示人明易之元亨利貞萬化之原也故君子行此四者曰乾元亨利貞而玄配之以君子能此五者曰罔直蒙酋冥愚不知罔直蒙酋冥於元亨利貞之義何得哉易之陰陽剛柔仁義三才之本也故立天之道曰陰與陽立地之道曰柔與剛立人之道曰仁與義而玄配之以立天之經曰陰與陽形地之緯曰縱與橫表人之行曰晦與明愚不知縱橫晦明與剛柔仁義之旨何有哉其他效爲天爲圜等語則有爲雷爲鼓之辭效革去故鼎取新等語則有更造新常因故之說效十三卦所取則有衣裳圭璧槐擬之論若此之類不可勝數而於易道初無一補前不足以發往聖之心後不足以開來哲之耳目子思氏之中庸孟軻氏之七篇所以與堯孔心傳千載若合符契者何嘗必爲如是之配倣哉抑又多爲